

Sing vooraf staande: Psalm 118:3 (p. 576)

- 3 Toe ek, omring van alle sye, / die vyand rondom my sien staan,
het God my stem gehoor uit lye, / en my weer veilig uit laat gaan.
Ek sal nie langer hulp'loos wees nie, / of wanhoop selfs in doodsgevaar:
ek sal die mens nie langer vrees nie, / wat magt'loos is as God bewaar.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Lofpsalm 66:1 (320)

- 1 Juig, aarde, juig met blye galme, / laat jubels opstyg uit die stof!
Sing tot Gods eer jul dankb're psalme, / en maak Hom heerlik in jul lof.
Sy grootheid ken geen maat of perke, / geen grens is daar vir sy gesag;
die vyand sien met skrik sy werke / en buig hom kruipend voor sy mag.

Geloofsbelydenis: Apostolicum

Na die wet antwoord ons met Psalm 91:8 (p. 462)

Wet

Psalm 91:8 (p. 462)

- 8 "Hy roep, en Ek beskerm hom daar, / totdat die nood verby is;
Ek lei hom na die hoogtes waar / 'n eerkrans hom berei is.
Die menseleef tyd, vlug en kort, / verleng Ek uit genade,
sodat hy blye aanskouer word / van al my reddingsdade."

Gebed

- *Doksologie:*
 - *Aanbidding:*
 - *Skuldbelydenis:*
 - *Vergifnis:*
 - *Dank:*
 - *Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God:*
 - *Algemene bede:*
 - *Verligting van die Gees ter wille van die Woorddiens:*
- Amen.

Psalm 105:2 (p. 514)

- 2 Laat almal juig met blye galme; / sing voor die HEER jul vreugdepsalme;
beroem jul in sy heil'ge Naam, / Laat almal wat Hom soek, nou saam
hul hart verenig tot sy eer / en hul verlustig in die HEER.

Skriflesing: Openbaring 2:8-11

Teks: Openbaring 2:10

Wees vir niks wat jy sal ly nie ... Wees getrou tot die dood toe, en Ek sal jou die kroon van die lewe gee. (Openbaring 2:10 AFR1953)

Dink u die Here weet nie watter hartseer u alles in u lewe deurmaak nie? Of dat Hy dalk weet, maar geen meegevoel met u oor die saak het nie? Of dat Hy genadeloos is, want dis dan Hy wat dit bewerk?

Feit is: Die Here openbaar Homself as 'n lewende Redder wat meegevoel het met ons pyn, en ook self daarmee moet meelewe.

- Hy openbaar Hom as die Een wat reeds die dood oorwin het, en wat ons ook oor die dood gaan laat oorwin.

Dis die betekenis van hierdie brief:

- Die Here weet van al ons smarte, maar Hy bemoedig ons.
- Hy wil hê ons moet weet en glo dat die smarte 'n grens het wat dit nie kan oorsteek nie, maar ons gaan deur sy verdienste daardie punt verbysteek, en dan gaan ons sonder hartseer en smarte by Hom wees in ewigheid.

Kom ons kyk kortliks na die gemeente van Smirna.

- Ons weet nie presies wanneer hierdie gemeente van Smirna ontstaan het nie.
- Dit is moontlik dat die evangelie in Smirna verkondig is in daardie paar jaar toe Paulus in Efese gebly het, want Lukas skryf in Handeling 19:10 dat al die inwoners van die groot provinsie Asië in daardie dae die evangelie gehoor het.
- Smirna word nie daar by die naam genoem nie, maar ons aanvaar dit as 'n moontlikheid dat die stad toe met die Christendom kennis gemaak het.

Daar was drie stede wat met mekaar gewedwyer het om die mooiste en belangrikste stad in Asië te wees: Pergamus, Efese en Smirna.

- Smirna het hierdie stryd gewen, en daar is op hulle geldstelsel die sin aangebring dat Smirna die eerste in grootte en skoonheid is.
- Dit was dus 'n groot en mooi stad. Daarby was dit 'n geweldige ryk stad.
- Smirna het 'n baie groot hawe gehad wat baie verkeer gedra het uit die Ooste. Dit was 'n handelstad by uitnemendheid omdat dit sowel see- as landverbindings met die handel gehad het.

Maar, die gemeente self het nie die kenmerke van hulle stad gedra nie. Hulle was brandarm mense.

Dink net hoe ondraaglik dit vir die gemeente was om arm te wees in 'n stad waar alles aan geld en vertoon gemeet word.

- Nou moet u nie dink dat die gemeentelede maar van voor hulle bekering af arm gewees het nie!
- Dis juis wat hulle ellendes so erg gemaak het: Hulle was almal skatryk mense wat tot bekering gekom het, maar omdat hulle die heidense godsdienste verlaat het, en Christene geword het, het die ander mense hulle geïsoleer.
- Die gevolg was dat hulle besighede bankrot gegaan het, en dat hulle nou in armoede moes lewe.

Kan u dink hoe dikwels moes een van die gemeentelede homself afgevra het: Is dit alles die moeite werd? Is ek nie dalk gek om deur soveel pyn te gaan ter wille van Jesus Christus nie?

Nou kom ons by die saak waaroor dit hier gaan.

- Is die Here Jesus Christus die moeite werd om as God te aanbid en te dien?
- Want dis geen geheim dat Christen wees baie ellendes oor ons bewerk nie.
- Daar is baie van ons wat deur die geloof gedwing word om onder sekere omstandighede nie met sekere dinge te meng nie, terwyl ons weet dat dit ons sosiaal baie skade aandoen.

Daar is gelukkig nog baie ouers wat huil oor hulle kinders se ongehoorsaamheid.

- Hierdie ouers sou nie gehuil het as hulle ongelowig was nie, want die ongelowiges steur hulle min aan skande of sonde.
- Daar is gelowige kinders wat skaam is vir hulle ouers omdat hulle ouers hulle skuldig maak aan huweliksontrou, rusies en 'n geskinder by ander mense.
- Hulle skaamte word juis gebore uit hulle liefde vir dit wat by God reg is, en waaraan hulle ouers hulle nie steur nie.
- Dan kom daarby nog die kwetsende gevoelens wat ons beleef as die mense uit ons familie en vriendekring nie die nodige respek vir God bewys nie.

Teen hierdie agtergrond klink die Here Jesus se woorde in vers 8 waar Hy Homself aan ons bekendstel: Hy is die Eerste en die Laaste.

- Hy het mag oor lewe en dood, want Hy het die dood oorwin. Hy het dus ook die krag en mag om ons in ons lewenstryd te laat oorwin.
- Hierdie hartseer en arm gemeente moet net na die Here toe kyk. Hy voer hulle by hulle stryd en lyding verby, na die ewige lewe toe waar Hy is, want Hy het smarte en die dood omskep in ewige lewe, vreugde en heerlikheid vir sy kerk.

Ons is ook soos die gemeente wat in vers 9 beskryf word, omdat ons ook kerk van die Here is. Omdat ons ook uitverkorenes is, daarom geld die troos van die brief ook vir ons.

- Al het ons in die wêreld te doen met minagting van ander mense omdat ons ons beginsels handhaaf, en al het ons baie keer te doen met pyn en met die werk van die satan op baie vlakke – dié dinge is alles tydelik en het geen duursaamheid in hulleself nie.
- Dit moet u onthou: Kwaad is nie duursaam nie. Kwaad word altyd deur God ingehaal en uitgewis.
- Kwaad kan hoogstens in hierdie lewe bestaan – en moontlik opbou tot met die wederkoms. Maar die oomblik wanneer die Here op die wolke verskyn, stort die kwaad in duie omdat dit geen weerstand teen God het nie, maar ook omdat dit nie voor God se heiligheid kan bestaan nie.

Dit is die groot troos waarvan die Here praat in hierdie gedeelte.

- Ware kinders van die Here – werklike liefhebbers van God en sy Woord – word deur die Here Jesus liefgehê en beskerm.
- Hulle kyk by die tweede dood nie die hel in die gesig nie, maar sal in die hemel ingaan deur God se genade.

Daarom is daar groot rykdom daarin as jy al die verdrukking wat oor jou kom, tot eer van God kan hanteer.

- Natuurlik preek dieselfde vers ook oordeel oor die sogenaamde kerkmense wat allerhande kwaad oor die ware gelowiges werk.
- Die Here gebruik geen sagte woorde vir hulle nie – Hy noem hulle die sinagoge van die satan!

Onthou tog dat hierdie brief aan Smirna vir kerkmense geskryf word.

- Die Here praat hier van 'n sinagoge. 'n Sinagoge is mos die plek waar die Here aanbid word.
- Die Here noem die valse gelowiges 'n sinagoge vir die satan – dit is dus mense wat voorgee dat hulle God aanbid maar met 'n verkeerde lewe medegelowiges leed aandoen.

Dit gaan oor mense wat maak asof hulle die Here aanbid, maar hulle lewe kom nie by ware aanbidding uit nie.

- Dit is net 'n feit dat ongelowiges en valse gelowiges altyd vir die ware gelowiges baie leed en smarte veroorsaak.
- Daarom bevestig die Here in vers 10 sy genade oor die ware gelowiges: **Vrees vir niks wat julle sal ly nie ...**

Kyk net wat gaan hier aan: Die Here gaan nie die dinge wat die lyding veroorsaak verwyder nie.

- Trouens, die Here onderstreep dit dat daar baie lyding oor die gelowiges gaan kom.
- Hy lê klem op die wese wat al hierdie ellendes bewerk: die duiwel.

Kyk die duiwel gaan sommige van julle in die gevangenis werp, sodat julle op die proef gestel kan word, ... (Openbaring 2:10 AFR1953)

Die duiwel gaan sekerlik mense gebruik om die gelowiges in die tronk te stop en te martel.

- Maar die Here stel die saak in perspektief: die bewerk van dit alles is die duiwel.
- Die satan kon nog nooit iets duursaams bewerk nie. Hierdie gedeelte preek dit veral sterk.
- Ons moet natuurlik nie die genade in die saak miskyk nie. Die Here Jesus verwoes die duiwel se werk.
- Hy vernietig die ellendes wat die duiwel bewerk en vervang dit met die kroon van die ewige lewe wat Hy aan ons gee.

Ons oorleef die tyd van verderf. Dit wat God ons gee, is langer en meer duursaam as die satan se werke en hulle gevolge.

- Daar staan ook dat die tydperk van vervolging 10 dae is.
- Die getal is simbolies, en dui bloot aan dat die satan heeltemal beperk is.
- Die satan is so begrens deur die Here dat hy nie eers self kan besluit hoe lank hy die gelowiges wil verdruk nie.

Die vervolging word afgesluit met die kroon van die lewe wat ons van die Here Jesus ontvang. Dus, koningskap om met lewe te regeer oor die dood en verderf. Wat meer kan 'n mens vra?

- Die Christusprediking van hierdie gedeelte is dat die Here self hier leer dat Hy gaan sterf het omdat Hy oor ons bewoë is.
- Sy opstanding is om die lewe te verwerf en uit te deel.
- Sy wederkoms is om te vervul wat Hy beloof het.

Gemeente van die Here, die Here boodskap aan u dat u geen lyding moet vrees nie, want alle lyding oor ons is tydelik en begrens.

- Lyding breek nie saam met ons deur in die ewigheid in nie. Dit bly hier agter en word uiteindelik by die wederkoms saam met die satan en sy magte in die hel verseël.
- Wees getrou tot die dood toe, want met die dood verander ons stryd en hartseer in die lewe van 'n koning wat saam met God leef in volmaaktheid.

Amen

Slotgebed

Slotpsalm 31:12 (p. 146)

12 HEER, in u hande is my tye; / ek steun in al my leed / op U alleen wat weet
die maat en einde van my lye. / Red my, o sielsverblyder, / van vyand en bestryder.

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Hulpdienspredikant
Gereformeerde Kerk Clanwilliam
Datum: 25 Maart 2012